

WHAKAWHITIWHITI I NGĀ MINITA

Ka maha nga tau ka pahure ake nei kaore ano nga Minita kia whakanekehia. I te wa o te Hinota o te Pihopatanga o Waiapu i puta te whakaaro o etahi o nga Minita kia whakanekehia etahi o ratou. No muri iho o te Hinota ka hui te Pihopa o Waiapu raua ko te Pihopa o Aotearoa, a whakaritea ana ko nga whakanekeneke mo tenei wa ko enei e mau ake nei:—

Ko Rev. Wharetini Rangi ka nuku atu i te Pariha o Wai-pawa ki Ruatoki. Ko te Whare Mihana i Ruatoki hei kainga nohanga mo te Minita, a ka whakaritea ko Rotu, hoa wahine o Rev. Rangi, hei whakahaere i te Whare Mihana. Ka whakahokia te kaupapa whakehaere o tenei Mihana ki te ahua i te wa i tukuna ai tenei wahi e Tuhoe mo te Mihana, ara hei kainga akoako i nga tamariki o Tuhoe ki nga kaupapa o te Whakapono me nga matauranga o te kura.

Ko Rev. Ropere Tahuriorangi, Minita o Ruatoki, ka whakanohoia ki te Pariha o Tauranga.

Ko Rev. Ra Rangiaho ka hikitia atu i te Pariha o Te Wai-patu ki te Pariha o Waipawa.

Ko Rev. Wanoa ka whakanohoia hei whakahaere i te Pariha o Te Waipatu, ko Rev. P. Hakiwai hei awhina i a ia mo te whakatakoto i te Hapa a te Ariki i te mea he rikona tonu a Wanoa.

Ko Rev. Paora Temuera o Taupo, ka nekehia ki te Pariha o Manutuke a ko Rev. Tureia Puha ka nekehia ki Taupo.

Hei te timitanga o te tau enei whakawhitiwhiti i nga Minita whakatutuki ai.

No reira e tono ana nga Pihopa kia manawanui nga Minita tae noa ki nga Pariha mo enei whakanekeneke.

TE KARETI MAORI O OTAKI

Ki nga Etita: E hoa ma tena korua me nga morehu o tena marae o tena marae o te Motu—Tena koutou katoa.

Tenei au te noho atu nei i toku kainga i Otaki i puta mai ai i mua te reo o te Kariti hei whakararata i te tupuhi me te hau kino i kerī ra i aua ra, ara nga taua a te Rauparaha.

Kua rereke enei ra o te ao-hou engari kei te tu tonu te Kareti Maori i timataia nei e te Harawira, a he whakaaro noku ki tenei kura ki tera hoki i Wairarapa i tuhituhi atu ai au ki a koutou. He kura ririki enei, pai hoki, engari ahakoa tena kua matou e whakahaweatia e koutou—E ki ana te whakatauki a Ngati-Raukawa “He iti na Motai nana i takahi te one-one i Hakerekere.” Kaore au e whakahe i nga kura nunui pera me te Aute, Tipene, Hukarere—kao—kei te mohio au ki te pai o era engari kua nui haere te utu ma te tangata mo aua kura a kua taumaha te pikaunga ma te tangata whai tamariki